

Na člana 106. Statuta općine Ilijaš ('Službene novine Kantona Sarajevo' br.20/09-prečišćeni tekst i 46/18), Općinski načelnik donosi :

PRAVILNIK

o uslovima, načinu zaključivanja i provedbi ugovora o djelu

Član 1.

Ovim Pravilnikom utvrđuju se uslovi, način zaključenja i provedbe ugovora o djelu.

Ugovor o djelu je ugovor kojim se jedna ugovorna strana (izvođač) obavezuje da će izvršiti određeni posao, dok se druga ugovorna strana (naručilac) obavezuje da za to plati naknadu. Ugovor o djelu se zaključuje radi izvršenja određenog fizičkog ili intelektualnog rada.

Ugovorom o djelu se ne zasniva radni odnosu u Općini Ilijaš.

Ugovor o djelu ne može se zaključiti za radno mjesto koje je sistematizovano Pravilnikom o unutrašnjoj organizaciji i sistematizaciji radnih mjesta u Općini Ilijaš.

Ugovor se smatra zaključenim kada su se ugovorne strane saglasile o bitnim elementima ugovora, a to su predmet ugovora i naknada , i kada su isti obje ugovorne strane potpisale.

Ugovor o djelu ne može se zaključiti na period duži od 90. dana.

Sredstava za isplatu ugovora odjelu planiraju se kroz budžet sa pripadajućim porezima po važećim poreznim propisima.

Član 2.

U cilju transparentnosti, ekonomičnosti i efikasnog trošenja novca, obavezuje se, Služba za privredu i finansije Općine Ilijaš, da planira potrebna sredstva za ugovore o djelu u Budžetu općine.

Služba za privredu i finansije Općine Ilijaš u saradnji sa drugim službama, prilikom planiranja sredstava za ugovore o djelu u Budžetu općine, ima obavezu izvršiti analizu potreba za ugovorima o djelu.

Prilikom analize potreba za zaključivanje ugovora uzeće se u obzir izvršenje ugovora o djelu iz prethodne budžetske godine.

Obzirom na prirodu posla koji će se obuhvatiti ugovorom o djelu, analizira se i potreba kvalifikacija i zvanje za određeni angažman.

Član 3.

Od osobe koja se angažuje za izvršenje određenog ugovora o djelu zahtijevat će se dostavljanje dokaza o stručnoj spremi, zvanju te potrebnoj kvalifikaciji, kao i dokaza o mjestu prebivališta i broju transakcijskog računa.

Isplata sredstava po osnovu ugovora o djelu vršiti će se po dostavljanju izvještaja o izvršenju poslova od strane resorne Službe, a koja je podnijela zahtjev za zaključenje ugovora o djelu.

Izvještavanje o provedbi ugovora o djelu vršit će se kroz Izvještaj o izvršenju budžeta.

Član 4.

Visina naknade za lica koja se angažuju po osnovu ugovora o djelu – kao Izvršioce posla, utvrđuje se u mjesečnom neto iznosu kako slijedi:

- a) za poslove (najmanje SSS) do iznosa od 400,00 - 600,00 KM
- b) za poslove (najmanje VSS) do iznosa od 900,00- 1.300,00 KM

Ukoliko se lice angažuje za period manji od mjesec dana, visina naknade će se utvrditi shodno kvalifikacijama potrebnim za obavljanje tog posla iz stava 1. ovog člana i vremenu potrebnom za njegovo izvršenje (npr. Usluge prevoda, lektorisanja, vještačenja, pregleda i verificiranja tenderske dokumentacije i slično).

Visina naknade iz stava 1. i 2. ovog člana utvrđuje se prilikom zaključivanja ugovora o djelu za svaki konkretan posao koji je predmet ugovora.

Obračun i isplata neto naknade iz stava 1. i 2. vršit će se na mjesečnom nivou i padaju na teret budžetske pozicije 613976 – izdaci za druge samostalne djelatnosti i povremeni samostalni rad, dok izdaci za pripadajuće poreze i doprinose padaju na teret budžetske pozicije 613980 – izdaci za poreze i doprinose.

Član 5.

Ovaj Pravilnik stupa na snagu danom donošenja.

Broj: _____

04/1-11-088/2022

Ilijaš, 22. 04. 2022. godine

OPĆINSKI NAČELNIK

Akif Fazlić, dipl. ecc.

